

摛藻堂四庫全書薈要

史部

欽定四庫全書  
會要卷五千六百九十三

史部

宋史卷六十五

元中書右丞相總裁托克托等修

五行志第十八

五行三木

曲直木之性也木失其性則為妖祥舊說以狂咎木冰  
恒雨服妖孽孽鷄禍青眚青祥之類皆屬之木今從之  
太平興國六年正月瑞安縣民張度解木五片皆有天

下太平字至道六年修昭應宮有木斷之文如點漆貫  
徹上下體若梵書十一月襄州民劉士家生木有文如  
魚龍鳳鶴之狀七年五月撫州修天慶觀解木有文如  
墨畫雲氣峰巒人物衣冠之狀七月彰明縣崇仙觀柱  
有文為道士形及北斗七星象大中祥符八年晉州慶  
唐觀古柏中別生槐長丈餘天聖元年二月河楊柳二  
本連理六月河楊楂棗各連理五年正月綿谷縣松柏  
同本異榦九年十月公井縣冬青木連理明道元年八

月黃州橘木及柿木連枝康定元年十月始興縣柑兩  
木連理慶歷三年十二月澧州獻瑞木有文曰太平之  
道六年九月甲辰登州有巨木浮海而出者三十餘治  
平四年六月汀州進桐木板二有文曰天下太平熙寧  
元年三月簡州木連理是歲英州因雷震一山梓樹盡  
枯而為龍腦價為之賤至京師一兩纔值錢一千四百  
二年建州民楊緯言元年三月大雷雨所居之西有黃  
龍見下獲一木如龍而形未具七月大雷雨復有龍飛

其下及霧木龍尾翼足皆具歸合舊木宛然一體圖象  
以進十年八月乙巳惠州柚木有文曰王帝萬年天下  
太平元豐元年五月劍州木連理三年六月己未饒州  
長山雨木子數畝狀類山芋子味香而辛土人以為桂  
子又曰菩提子明道中嘗有之是歲大稔十二月泌陽  
縣甘棠木連理六年五月衛真縣洞霄宮枯槐生枝葉  
元祐元年八月己丑杭州民俞舉慶七世同居家園木  
連理五年四月德州木連理元符元年八月施州李木

連理二年九月眉山縣榦木二株異根同榦木枝相附  
崇寧四年正月襄城縣李梨木連理大觀元年三月湟  
州櫛木生葉八月瑞州永興軍並木連理二年十二月  
岢嵐軍園池生瑞木政和三年七月玉華殿萬年枝木  
連理南雄州楓木連理十月武義縣木根有萬宋年歲  
四字四年建州木連理六月沅陵縣江漲流出楠木二  
十七可為明堂梁柱蔡京等拜表賀九月甲申彭城縣  
栢開華十二月辛丑元氏縣民王寘屋柱槐木再生枝

葉高四十餘丈是歲邵州海棠木連理澤州台州槐木連理荆開軍紫薇木連理六年坊充洪明夔徐新全隰太平州並木連理梅州枯木生枝宣和二年四月永州民劉思析薪有天下太平字紹興十四年四月虔州民毀歌屋析柱木裏有文曰天下太平時守臣薛弼上之方大亂近木妖也二十年八月福州冲虛觀皂莢木翠葉再實十一年建德縣定林寺桑生李實栗生桃實占曰木生異實國主殃二十五年十月贛州獻太平木

時秦檜擅朝喜飾太平郡國多上草木之妖以為瑞紹  
興間漢陽軍有插榴枝於石罅秀茂成陰歲有花實者  
初郡獄有誣服孝婦殺姑婦不能自明屬行刑者插髻  
上華於石隙曰生則可以驗吾冤行刑者如其言後果  
生淳熙十六年三月揚州桑生瓜櫻桃生茹此草木互  
為妖也七月晉陵縣民析薪中有木字曰紹熙五年如  
是者二是時紹熙猶未改元其後果止五年此近木妖  
也紹熙四年富陽縣栗生來禽實五年行都雨木與唐

志貞元陳留雨木同占木生于下而自上隕者將有上下易位之象嘉定六年五月己巳嚴州淳安遂安桐廬三縣大木自拔占曰木自拔國將亂景定四年五月成都太祖廟側大木仆忽起立生三芽德祐二年正月戊辰寶應縣民析薪中有天太下趙四字獻之制置使李庭芝賞之以錢五千

咸平六年十一月庚戌雨木冰大中祥符五年正月戊寅京師雨木冰天禧五年正月戊寅京師雨木冰慶歷

三年十二月丁巳雪木氷占曰兵象也嘉祐元年正月  
雨木氷治平二年十月乙巳雨木氷熙寧三年十月八  
年正月九年正月京師雨木氷元祐八年二月京師大  
寒霰雪雨木氷宣和五年十月乙酉雨木氷靖康元年  
十月乙卯雨木氷二年正月丁酉雨木氷紹興五年十  
一月辛亥雨木氷宣和六年御樓觀燈時開封尹設次  
以彈壓於觀下帝從六宮於其上以觀天府之斷決者  
簾幕深密下無由知衆中忽有人躍出黑色布衣若寺

僧童行狀以手畫簾出指斥語執于觀下帝怒甚令中使傳旨治之箠掠亂下又加炮烙詢其誰何畧不一語亦無痛楚之狀又斷其足筋俄施刀彎血肉狼藉帝大不悅為罷一夕之懼竟不得其何人付獄盡之七年八月都城東門外鬻菜夫至宣德門下忽若迷罔釋荷擔向門戟手出悖罵語且曰太祖皇帝神宗皇帝使我來道尚宜速改也邇卒捕之下開封獄一夕方省則不知向者所為者乃於獄中盡之建炎二年十一月高宗在

揚州郊祀後數日有狂人具衣冠執香爐攜絳囊拜於  
行宮門外自言天遣我為官家兒書於囊紙刻於右臂  
皆是語鞠之不得姓名高宗以其狂釋不問明年二月  
金人犯維揚三月有明受之變紹興元年四月庚辰閻  
州有狂僧衰絰哭於郡譙門曰今日佛下世且言且哭  
實隆祐太后上仙日云闊距行都萬里踰月而遺詔至  
淳熙十四年正月紹興府有狂人突入恩平郡王第升  
堂踐王坐曰我太上皇孫來赴郡鞠訊終不語亦狂咎

也是冬高宗崩明年八月王薨紹興二年十二月庚辰  
昧爽成都府有人衰服入帳門大呼聞帥京鐘姓名亦  
狂咎也

建隆元年十月蔡州大霖雨道路行舟開寶二年八月  
帝駐潞州積雨累日未止九月京師大雨霖五年京師  
雨連旬不止河南河北諸州皆大霖雨九年秋大霖雨  
太平興國二年道州春夏霖雨不止平地二丈餘五年  
五月京師連旬雨不止七年六月齊州逮捕臨邑尉王

坦等六人繫獄未具一夕大風雨壞獄戶王坦等六人  
並壓死雍熙二年八月京師大霖雨淳化元年六月隴  
城縣大雨壞官私廬舍殆盡溺死者百三十七人三年  
九月京師霖雨四年七月京師大雨十晝夜不止朱雀  
崇明門外積水尤甚軍營廬舍多壞是秋陳頴宋毫許  
蔡徐濮澶博諸州霖雨秋稼多敗五年秋開封府宋毫  
陳頴泗壽鄧蔡潤諸州雨水害稼咸平元年五月昭州  
大霖雨害民田溺死者百五十七人景德三年八月青

州大雨壞鼓角樓門壓死者四人大中祥符二年八月  
無為軍大風霖雨折木壞城門軍營民舍壓溺千餘人  
十月兗州霖雨害稼三年四月昇州霖雨五月辛丑京  
師大雨平地數尺壞軍營民舍多壓者近畿積潦五年  
九月建安軍大霖雨害農事天禧四年七月京師連雨  
彌月甲子夜大雨流潦汎溢民舍軍營圮壞大半多壓  
死者自是頻雨及冬方止乾興元年二月蘇湖秀州雨  
壞民田天聖四年六月戊寅莫州大雨壞城壁七年自

春涉夏雨不止明道二年六月癸丑京師雨壞軍營府  
庫景祐三年七月庚子大雨震電慶厯六年七月丁亥  
河東大雨壞忻代等州城壁皇祐二年八月深州大雨  
壞民廬舍四年八月癸未京城大風雨民廬催圮至有  
壓死者嘉祐二年八月河東沿邊久雨瀕河之民多流  
移五月丁未晝夜大雨六月乙亥雨壞大社大稷壇三  
年八月霖雨害稼六年七月河北京西淮南雨浙江南  
東西淫雨為災閏八月京師久雨是歲頻雨及冬方止

治平元年京師自夏歷秋久雨不止摧真宗及穆獻懿  
三后陵臺熙寧元年八月冀州大雨壞官私廬舍城壁  
七年六月陝州大雨漂溺陝平陸二縣元豐四年七月  
秦州海風駕大雨漂浸州城壞公私舍數千楹元祐二  
年七月丁卯以雨罷集英殿宴元符二年九月以久雨  
罷秋宴三年七月久雨哲宗大昇輦在道陷泥中建中  
靖國元年二月久雨時欽聖憲肅皇后欽慈皇后二陵  
方用工詔京西祈晴崇寧元年七月久雨壞京城廬舍

民多壓溺而死者三年六月久雨四年五月京師久雨  
又自七月至九月所在霖雨傷稼十月始霽靖康元年  
四月京師大雨天氣清寒又自五月甲申至六月暴雨  
傷麥夏行秋令建炎二年春淫雨三年二月癸亥高宗  
初至杭州久霖雨占曰陰盛下有陰謀時苗傅劉正彥  
為亂五月霖雨夏寒紹興元年行都雨壞城三百八十  
丈是歲婺州雨壞城三年雨自正月朔至於二月七月  
四川霖雨至於明年正月四年六月淫雨害稼蘇湖二

州為甚九月久雨時劉豫連金人入境十月高宗親征而霖五年三月霖雨傷蚕麥行都雨甚九月雨至于明年正月六年五月久雨不止七年十月高宗如建康久雨八年三月積雨至於四月傷蚕麥害稼二十一年夏襄陽府大雨十餘日二十三年六月大雨壞軍壘民田三十年五月久雨傷蚕麥害稼八月施州大風雨三十二年六月浙西大霖雨隆興元年三月霖雨行都壞城三百三十餘丈二年六月陰雨七月浙西江東大雨害

稼八月風雨踰月乾道元年二月行都及越湖常潤溫  
台明處九郡寒敗首種損蚕麥二年正月淫雨至於四  
月夏寒江浙諸郡損稼蚕麥不登三年五月丙午泉州  
大雨晝夜不止者旬日八月淫雨江浙淮閩禾麻菽麥  
粟多腐四年四月陰雨彌月六年五月連雨六十餘日  
十一月連雨辛巳郊祀雲開於園丘百步外有澍雨八  
年四月四川陰雨七十餘日六月壬寅大雨徹晝夜至  
于己酉九年閏正月淫雨淳熙二年夏建康府淫雨壞

城郭三年五月淮浙積雨損禾麥八月浙東西江東連  
雨癸未甲申行都大風雨九月久雨十月癸酉孝宗出  
手詔決獄援筆而風起閩寧四年九月丁酉戊戌紹興  
府餘姚上虞二縣大風雨五年閏六月己亥階州暴雨  
至於戊申乙巳興化軍福州福清縣暴雨夜作六年  
四月衢州霖雨九月連雨己巳將郊而霽八年四月雨  
腐禾麥五月久雨敗首種十年五月信州霖雨自甲戌  
至於辛巳八月福州大霖雨自己未至于九月乙丑吉

州亦如之十一年四月淫雨戊寅建康府太平州大霖  
雨六月甲申處州龍泉縣暴雨十二年五月六月皆霖  
雨十三年秋利州路霖雨敗禾稼種稑金洋階成岷鳳  
六州亦如之十五年五月荆淮郡國連雨戊午祁門縣  
霖雨十六年四月西和州霖雨害禾麥五月浙西北  
福建淮東利西諸道霖雨紹興元年春久陰連雨至於  
三月夏階成岷鳳四州霖雨傷麥二年二月贛州霖雨  
連春夏不止壞城四百九十丈圮城樓敵樓凡十五所

四月福建路霖雨至於五月七月利路久雨傷種麥癸亥興州暴雨連日八月行都久雨三年五月江東河北路連雨常德府大雨徹晝夜自壬辰至于庚子寧國府池州廣德軍自己亥至於六月辛丑朔雨甚祁門縣至于庚戌七月壬申天台仙居二縣大雨連旬淮西路鎮江襄陽府皆害禾麥八月普州雨害稼四年四月霖雨至於五月浙東西江東湖北郡縣壞圩田害蚕麥蔬稑紹興寧國府尤甚鎮江府大雨自辛未至于丙子淮西

郡縣自丙子至於戊寅五年八月霖雨畿縣浙東西皆  
害稼九月雨至於十月癸巳大雨三晝夜不止江東西  
福建郡縣皆苦雨慶元元年正月霖雨甲辰帝蔬食露  
禱丙午霽二月又雨至于三月傷麥五月霖雨七月雨  
至于八月二年六月壬申台州焱風暴雨連夕八月行  
都霖雨五十餘日三年七月雨連月四年八月久雨五  
年五月行都雨壞城夜壓附城民廬多死者六月浙東  
西霖雨至于八月六年五月庚午嚴州霖雨連五晝夜

不  
止  
嘉  
泰  
二  
年  
六  
月  
福  
建  
路  
連  
雨  
至  
于  
七  
月  
丁  
未  
大  
風  
雨  
為  
災  
三  
年  
八  
月  
久  
雨  
開  
禧  
元  
年  
七  
月  
利  
州  
郡  
縣  
霖  
雨  
害  
稼  
閏  
月  
盱  
眙  
軍  
陰  
雨  
至  
於  
九  
月  
敗  
禾  
稑  
十  
月  
行  
都  
澇  
雨  
至  
於  
明  
年  
春  
二  
年  
春  
淫  
雨  
至  
於  
三  
月  
嘉  
定  
二  
年  
五  
月  
戊  
戌  
連  
州  
大  
雨  
連  
晝  
夜  
六  
月  
利  
閩  
成  
西  
和  
四  
州  
霖  
雨  
七  
月  
壬  
辰  
台  
州  
大  
風  
雨  
夜  
作  
三  
年  
三  
月  
陰  
雨  
六  
十  
餘  
日  
五  
月  
淫  
雨  
至  
於  
六  
月  
首  
種  
多  
敗  
蚕  
麥  
不  
登  
四  
年  
八  
月  
霖  
雨  
至  
於  
九  
月  
五  
年  
春  
淫  
雨  
至  
於  
三  
月  
傷  
蚕  
麥  
十一  
月  
雨  
雪

積陰至於明年春六年春淫雨至於二月丁亥雨雪集  
霰五月陰雨經日辛酉嚴州霖雨六月戊子紹興府大  
風雨浙東西雨至於七月七年九月陰雨至於十月害  
禾麥九年四月六月大霖雨浙東西郡縣尤甚十年三  
月連雨至於四月十月霖雨害稼十一年六月霖雨浙  
西郡縣尤甚十二年六月霖雨彌月十五年七月浙東  
西霖雨為災十六年五月霖雨浙西北江東淮東尤  
甚八月大風雨害稼十七年八月霖雨

乾德四年二月長春節甘露降江寧府報恩院五年二月甘露降江寧府玉泉寺松樹開寶元年十二月甘露降蔡州僧院柏樹太平興國三年正月甘露降壽州解四年五月甘露降河東縣解叢竹凡三日七年四月丙戌知漢州安守亮獻柏葉上甘露一罈九年三月丙子甘露降西京南太一宮新城雍熙三年四月庚子甘露降後院草木四年十二月甘露降興化軍羅漢峰前五松端拱二年二月甘露降壽州解園柏及資聖寺檜淳

化二年十二月資州解及延壽觀德純寺甘露降松柏  
凡六日三年正月舒州二月衢州四月舒州四年六月  
舒州並甘露降至道二年四月蘄州三年五月泉州六  
月蘇州甘露降咸平元年四月甘露降平戎軍解果樹  
凡九十餘本十一月甘露降亳州真觀靈寶柏樹二年  
五月太平州潯州三年二月泉州十一月潯州四年二  
月冀州五年正月桂州十一月許州並甘露降景德元  
年義寧縣二年正月鬱林州二月晉州及神山縣三年

正月梓州四月遂州十二月榮州懷安軍甘露降大中  
祥符元年十二月上饒縣信陽軍二年正月信陽軍陳  
鄂二州三月陵昇梓三州三年二月柳州懷安軍閩二  
月富順監五月澤耀晉益四州四年正月梓州三月澤  
州四月常州五年四月遂州五月無為軍六年六月梓州七  
月真定府十一月榮州開元寺六年三月梓州六月廊  
州八月遂州九月信州十月亳州太清宮十一月潯州  
十二月榮州南儀州七年二月鳳翔府天慶觀五月鄆

州十月亳州太清宮十二月彭州天慶觀八年正月中  
江縣二月果州十月衢州九年十一月玉清昭應宮並  
甘露降天禧元年正月貴州天慶觀二月玉清昭應宮  
三月後苑四月會靈觀五月廬州通判廳及后土祠十  
二月昭州天慶觀二年十二月榮州開元寺懷安軍天  
慶觀三年四月舒州五月益州四年三月邵武軍十二  
月平泉縣五年三月泉州十一月韶州並甘露降天聖  
元年正月柳州十一月河南府二年五月鳳州十月涇

州四年榮州懷安軍六年太平州七年正月益州九年正月榮州並甘露降明道元年十一月韶州梓州甘露降景祐四年十一月成德軍慶歷四年正月桂州皇祐三年十二月吉州嘉祐七年三月眉州蓬州九月陵州並甘露降熙寧元年距元豐八年甘露降凡二十餘處元祐元年距元符三年亦如之大觀初甘露降於九成宮帝鼐室三年冬降于尚書省及六曹御製七言四韻詩賜執政已下其後內自禁中及宣和殿延福宮神霄

宮下至三學開封府大理寺宰臣私第皆有之歲歲拜  
表稱賀

建隆初蜀孟昶末年婦女競治髮為高髻號朝天髻未  
幾昶入朝京師江南李煜末年有衛士秦友登壽昌堂  
榻覆其靴而坐訊之風狂不寤識者云靴履也李氏將  
覆於此地而為秦所有乎履與李友與有同音趙與秦  
同祖也又煜宮中盛雨水染淺碧為衣號天水碧未幾  
為王師所克士女至京師猶有服之者天水國之姓望

也淳化三年京師里巷婦人競剪黑光紙團麪又裝縷  
魚腮中骨號魚媚子以飾面黑北方色魚水族皆陰類  
也面為六陽之首陰侵於陽將有水災明年京師秋冬  
積雨衢路水深數尺景德四年春京城小兒裂裳為小  
兒旗繫竿首相對揮飐兵鬪之象也是歲宜州卒陳進  
為亂出師討平之紹興二十一年行都豪貴競為小青  
蓋飾赤油火硃於蓋之項出都門外傳呼于道硃者乘  
輿服御飾升龍用焉臣庶以加于小蓋近服妖亦僭咎

也二十三年士庶家競以胎鹿皮製婦人冠山民採捕  
胎鹿無遺時去宣和未遠婦人服飾猶集翠羽為之近  
服妖也二十七年交趾貢翠羽數百命焚之通衢立法  
以禁紹興元年里巷婦人以琉璃為首飾唐志琉璃釵  
鉶有流離之兆亦服妖也後連年有流徙之厄理宗朝  
宮妃繫前後掩裙而長窄地名趕上裙梳高髻於項曰  
不走落束足纖直名快上馬粉點眼角名淚妝剃削童  
髮必留大錢許於項左名偏項或留之項前束以綵繪

宛若博焦之狀或曰鶴角咸淳五年都人以碾玉為首飾有詩云京師禁珠翠天下盡琉璃

太平興國三年三月鑿金明池既掘地有龜出殆踰萬數大中祥符二年四月有黑龜甚衆沿汴水而下至和元年二月信州貢綠毛龜大觀元年閏十月丙戌都水使者趙霆行河得兩首龜以為瑞蔡京信之曰此齊小白所謂象罔見之而霸者也鄭居中曰首豈容有二而京主之意殆不可測帝命棄龜金明池政和四年瑞州

進六目龜五年博州進白龜紹興八年五月許京太康  
縣大雷雨下冰龜數十里隨大小皆龜形具手足卦文  
乾道五年舒州民獻龜駢生二首不能伸縮郡守張棟  
縱之潛山近龜孽也嘉定十四年春楚州境上龜大小  
死者蔽野

咸平三年八月黃州羣鷄夜鳴至冬不止紹興初陳州  
民家鷄忽人言近鷄禍也松陽縣民家鷄生三足縣治  
有鷄伏卵毛生殼外近鷄禍亦毛孽也乾道六年西安

縣官塘有物鷄首人身高丈餘晝見於野慶元三年饒州軍營鷄卵出蛇近鷄孽亦蛇孽也婺源縣張村民家雌鷄化為雄烹之形冠距而腹卵孕同里洪氏家雄雞伏子中一雛三足咸淳五年常州鷄羽生距

建隆元年夏相金均房商五州鼠食苗二年五月商州鼠食苗乾德五年九月金州鼠食苗太平興國七年十月岳州鼠害稼紹興十六年清遠翁源真陽三縣鼠食稼千萬為羣時廣東大旱凡羽鱗皆化為鼠有獲鼠於

田者腹猶蛻文漁者夜設網旦視皆鼠自夏徂秋為患  
數月方息歲為饑近鼠妖也乾道九年隆興府鼠千萬  
為羣害稼淳熙五年八月淮東通泰楚高郵黑鼠食禾  
既歲大饑時江陵府郭外羣鼠多至塞路其色黑白青  
黃各異為車馬踐死者不可勝計踰三月乃息紹熙四  
年饒州民家二小鼠食牛角三徒牛牢不免角穿肉瘠  
以斃近鼠妖也慶元元年六月鄱陽縣民家一猫帶數  
十鼠行止食息皆同如母子相哺者民殺貓而鼠舐其

血鼠象盜貓職捕而反相與同處司盜廢職之象也與

唐龍朔洛州貓虎同占

紹興三年八月辛亥尚書省後樓無故自壞慶元元年  
夏建昌軍民居木柱有聲如牛鳴者三日乃止淳熙九  
年丞相賈似道起復之日在越上私第方拜家廟忽聞  
內有裂帛聲衆賓愕然密詢左右知家廟棟裂皆逡巡  
而退

宋史卷六十五


宋史卷六十五考證

五行志三木天聖元年二月河楊柳二本連理六月河楊檣棗各連理○臣召南按河楊當作河陽史記事必先著地名單言河字無此理也

荆開軍紫薇木連理○按荆開係荆門之訛

宣和六年御樓觀燈○按此文應提行寫前文言雨木冰此以下言狂人闡入宮禁也

宋史卷六十五考證



總校官庶吉士臣張能照  
校對官檢討臣王坦修  
謄錄監生臣張同翼

欽定四庫全書叢要

史部

宋史卷六十六



詳校官編修立王天祿

欽定四庫全書  
欽定古今圖書集成

卷五十六

史部

宋史卷六十六

元中書右丞相總裁托克托等修

行志第十九

五行四金



從革金性也金失其性則為變恠舊說以僭咎恒陽詩  
奴民訛毛蟲之孽白眚白祥之類皆屬之金今從之

建隆二年七月晉州神山縣北谷中有鐵隨水流出土

二丈三尺其重七千斤太平興國四年九月夾江縣民  
王誼得黑石二皆丹文其一云君王萬歲其二云趙二  
十一帝緘其石來獻至道二年二月桂陽監鎔銀自湧  
成山峰狀咸平四年十二月亳州太清宮鐘自鳴乾興  
元年四月甲戌修奉山陵總管言皇堂隧道穿得銅鍋  
有兩耳又於寢宮三門下穿得銅盂一鐵甕一鐵甲葉  
三天聖元年三月庚辰涪陵縣相思寺夜有光出阿育  
王塔之舊址發之得金銅像三百二十七五年七月壬

寅遼山縣舊河洼地摧塔獲古錢一百四十六千五百  
四十三文明道元年五月壬午漢州江岸獲古鐘一慶  
歷四年五月乙亥金谿縣得生金山重三百二十四兩  
皇祐四年乾寧軍漁人得小鍾二於河濱五年二月己  
亥乾寧軍又進古鐘一至和二年四月甲午瀏陽縣得  
古鐘一熙寧元年至元豐元年橫州共獲古銅鼓一十  
七元豐三年八月岳州永慶寺獲銅鐘一銅磬二六年  
南溪縣穿土得銅錢五萬四千有奇七年三月筠州獲

古銅鐘一十一月賓州獲古銅鼓一八年昌元縣通鹽  
井得銅鍋九銅盆一銅盤一崇寧五年十月荆南獲古  
銅鼎政和二年亥圭始出晉州上一石綠色方三尺餘  
當中有文曰堯天正其字如掌大而端楷類手畫者堯  
字居右天正字綴行于左都堂驗視磬石三分而字畫  
愈明又於堯字之下隱約出一瑞字位置始均蓋曰天  
正堯瑞云或謂晉陽堯都也方亥圭出乃有此瑞四年  
府畿汝蔡之間連山大小石皆變為瑪瑙尚方取為寶

帶器玩甚富五年正月湖南提舉常平劉欽言蘆荻衝  
出生金重九斤八兩狀類靈芝祥雲又淘得碎金四百  
七兩有奇十一月越州民拾生金湟州丁羊谷金坑僅  
千餘眼得鑛成金共四等計一百三十四兩有奇重和  
元年十二月孝感縣楚令尹子文廟獲周鼎六宣和四  
年後御府所藏往往復變為石而色類白骨此與周寶  
圭占略同五年榮陽縣賈谷山麒麟谷采石修明堂得  
一石有文曰明百官表賀五年四月又獲甗鼎三崇寧

四年三月鑄九鼎用金甚厚取九州水土內鼎中既奉安於九成宮車駕臨幸徧禮焉至北方之寶鼎忽漏水溢于外劉炳謬曰正北在燕山今寶鼎但取水土於雄州境宜不可用其後竟以北方致亂建炎元年南京留守朱勝非夜防城見南門外火光燭地掘之得銅印有文曰朱勝私印火鑠金所畏也後拜相有明受之變卒坐貶三年吉州修城役夫得髑髏棄水中俄浮一鐘有銘五十六字大略云唐興元年吾子沒瘞廬陵西壘

後當火德五九之際世衰道敗浙梁相繼喪亂章貢康  
昌之日吾亦復出是邦東平鳩工復使吾子同河伯聽  
命水官郡守命錄其辭錄畢而鐘自碎

紹興十一年三月庚申長安兵刃皆生火光二十六年  
鄆縣地出銅馬高三尺制作精好風雨夜嘶紹興中耕  
者得金甕重二十四鈞於秦檜別業乾道二年三月丙  
午夜福清縣石竹山大石自移聲如雷石方可九丈所  
過成蹊才四尺而山之木石如故

慶元二年十二月吳縣金鵝鄉銅錢百萬自飛

建隆二年京師夏旱冬又旱三年京師春夏旱河北大

旱霸州苗皆焦什又河南河中府孟津濮鄆齊濟滑延

隰宿等州並春夏不雨四年京師夏秋旱又懷州旱乾

德元年冬京師旱二年正月京師旱夏不雨是歲河南

府陝虢麟博靈州旱河中府旱甚四年春夏京師不雨

江陵府華州連水軍旱五年正月京師旱秋復旱開寶

二年夏至七月京師不雨三年春夏京師旱邠州夏旱

五年春京師旱冬又旱六年冬京師旱七年京師春夏  
旱冬又旱河南府晉解州夏旱滑州秋旱八年春京師  
旱是歲闕中饑旱甚大平興國二年正月京師旱三年  
春夏京師旱四年冬京師旱五年夏京師旱秋又旱六  
年春夏京師旱七年春京師旱孟虢絳密瀛衛曹淄州  
旱九年夏京師旱秋江南大旱雍熙二年冬京師旱三  
年冬京師旱四年冬京師旱端拱二年五月京師旱秋  
七月至十一月旱上憂形於色蔬食致禱是歲河南萊

登深冀旱甚民多饑死詔發倉粟貸之淳化元年正月至四月不雨帝蔬食祈雨河南鳳翔大名京兆府許滻單汝乾鄭同等州旱二年春京師大旱三年春京師大旱冬復大旱是歲河南府京東西河北河東陝西及亳建淮陽等三十六州軍旱四年夏京師不雨河南府許汝亳滑商州旱五年六月京師大旱至道元年京師春夏二年春夏京師旱咸平元年春夏京畿旱又江浙淮南荆湖四十六軍州旱二年春夏京師旱甚又廣南西路

江浙荆湖及曹單嵐州淮陽軍旱三年春京師旱江南  
頻年旱四年京畿正月至四月不雨景德元年京師夏  
旱人多渴死三年夏京師旱大中祥符二年春夏京師  
旱河南府及陝西路潭邢州旱三年夏京師旱江南諸  
路宿州潤州旱八年京師旱九年秋京師旱大名府澶  
州相州旱天禧元年京師春旱秋又旱夏陝西旱四年  
春利州路旱夏京師旱五年冬京師旱天聖二年春不  
雨五年夏秋大旱六年四月不雨明道元年五月畿縣

久旱傷苗二年南方大旱景祐三年六月河北久旱遣使詣北嶽祈雨慶歷元年九月丁未朔遣官祈雨二年六月戊寅祈雨三年遣使詣嶽瀆祈雨四年三月丙寅遣內侍兩浙淮南江南祠廟祈雨五年二月詔天久不雨令州縣決淹獄又幸大相國寺會靈觀天清寺祥源觀祈雨六年四月壬申遣使祈雨七年正月京師不雨二月丙寅遣官嶽瀆祈雨三月辛丑西太乙宮祈雨皇祐元年五月丁未遣官祈雨三年恩冀諸州旱三月分

遣朝臣詣天下名山大川祠廟祈雨至和二年四月甲午遣官祈雨嘉祐五年梓州路夏秋不雨七年三月甲子罷春燕以久旱故也辛丑西太乙宮祈雨治平元年春京師踰時不雨鄭滑蔡汝頴曹濮洛磁晉耀登等州河中府慶成軍旱二年春不雨熙寧二年三月旱甚三年諸路旱六月畿內旱八月衛州旱五年五月北京自春至夏不雨七年自春及夏河北河東陝西京東西淮南諸路久旱九月諸路復旱時新復洮河亦旱羌戶多

殍死八年四月真定府大旱八月淮南兩浙江南荆湖等路旱九年八月河北京東京西河東陝西旱十年春諸路旱元豐二年春河北陝西京東西諸郡旱三年春西北諸路旱五年亢旱六年夏畿內旱元祐元年春諸路旱正月帝及太皇太后車駕分日詣寺觀禱雨是冬復旱二年春旱三年秋諸路旱京西陝西尤甚四年春京師及東北旱罷春燕八年秋旱紹聖元年春旱疎決四京畿縣囚三年江東大旱溪涸竭四年夏兩浙旱

元符元年東南旱二年春京畿旱建中靖國元年衢信  
等州旱大觀二年淮南江東西諸路大旱自六月不雨  
至於十月政和元年淮南旱三年江東旱四年旱詔賑  
德州流民宣和元年二月詔汝潁陳蔡州饑民流移常  
平官勒停秋淮南旱四年東平府旱五年夏秦鳳路旱  
是歲燕山府路旱建炎二年夏旱紹興二年常州大旱  
帝問致旱之由中書舍人胡交修奏守臣周祀殘酷所  
致尋以屬吏坐贓及殺不辜竄嶺南三年四月旱至於

七月帝蔬食露禱乃雨五年五月浙東西旱五十餘日  
六月江東湖南旱秋四川郡國旱甚六年夔潼成都郡  
縣及湖南衡州皆旱七年春旱七十餘日時帝將如建  
業隨所在分遣從臣有事於名山大川六月又旱江南  
尤甚八年冬不雨九年六月旱六十餘日有事於山川  
十一年七月旱戊申有事於嶽瀆乙卯禱雨於圜丘方  
澤宗廟十二年三月旱六十餘日秋京西淮東旱十二  
月陝西旱十八年浙東西旱紹興府大旱十九年常州

鎮江府旱二十四年浙東西旱二十九年二月旱七十  
餘日秋江浙郡國旱三十年春階成鳳西和州旱秋江  
浙郡國旱浙東尤甚隆興元年江浙郡國旱京西大旱  
二年台州春旱興化軍漳福州大旱首種不入自春至  
於八月乾道三年春四川郡縣旱至於秋七月綿劒漢  
州石泉軍尤甚四年夏六月旱帝將徹蓋親禱於太乙  
宮而雨時襄陽隆興建寧亦旱八月詔頒皇祐祀龍法  
於郡縣五年夏秋淮東旱盱眙淮陰為甚六年夏浙東

福建路旱溫台福漳建為甚七年春江西東湖南北淮南浙婺秀州皆旱夏秋江洪筠潭饒州南康興國臨江軍尤甚首種不入冬不雨九年婺處溫台吉贛州臨江南諸軍江陵府皆久旱無麥苗淳熙元年浙東湖南郡國旱台處郴桂為甚蜀闕外四州旱二年秋江淮浙皆旱紹興鎮江寧國建康府常和滁真揚州盱眙廣德軍為甚三年夏常昭復隨郢金洋州江陵德安興元府荆門漢陽軍皆旱四年春襄陽府旱首種不入五年常綿

州鎮江府及淮南江東西郡國旱有事於山川羣望六年衡永楚州高郵軍旱七年湖南春旱諸道自四月不雨行都自七月不雨皆至於九月紹興隆興建康江陵府台婺常潤江筠撫吉饒信徽池舒蘄黃和潯衡永州興國臨江南康無爲軍皆大旱江筠徽婺州廣德軍無錫縣尤甚禱雨於天地宗廟社稷山川羣望八年正月甲戌積旱始雨七月不雨至於十一月臨安鎮江建康

江陵德安府越婺衢嚴湖常饒信徽楚鄂復昌州江陰

南康廣德興國漢陽信陽荆門長寧軍及京西淮郡皆旱九年夏五月不雨至於秋七月江陵德安襄陽府潤婺溫處洪吉撫筠袁潭鄂復恭合昌普資渠利閩忠涪萬州臨江建昌漢陽荆門信陽南平廣安梁山軍江山定海象山上虞嵊縣皆旱十年冬月旱至於七月江淮建康府和州興國軍恭涪瀘合金州南平軍旱十一年四月不雨至於八月興元府吉贛福泉汀漳潮梅循邑賓象金洋西和州建昌軍皆旱興元吉尤甚冬不雨至

於明年二月十四年五月旱六月戊寅有事於山川羣  
望甲申帝親禱於太乙宮七月己酉大雩於圜丘望於  
北郊有事於嶽瀆海凡山川之神時臨安鎮江紹興隆  
興府嚴常湖秀衢婺處明台饒信江吉撫筠袁州臨江  
興國建昌軍皆旱越婺台處江州興國軍尤甚至於九  
月乃雨十五年舒州旱紹興元年重慶府蘄池州旱二  
年五月真揚通泰楚滁和普隆涪渝遂高郵盱眙軍富  
順監皆旱簡資榮州大旱三年夏郢楊和州大旱秋簡

資普榮叙隆富順監亦大旱四年綿州大旱亡麥簡資  
普渠合州廣安軍旱江浙自六月不雨至於八月鎮江  
江陵府婺台信州江東淮西旱五年春浙東西自去冬  
不雨至於夏秋鎮江府常秀州江陰軍大旱廬和濠楚  
州為甚江西七郡亦旱慶元二年五月不雨三年潼利  
夔路十五郡旱自四月至九月金蓬普州大旱四月  
壬子禱於天地宗廟社稷六年四月旱五月辛未禱於  
郊丘宗社鎮江府常州大旱水竭淮郡自春無雨首種

不入及京襄皆旱嘉泰元年五月旱丙辰禱於郊丘宗  
社戊辰大雩於圜丘浙西郡縣及蜀十五郡皆大旱二  
年春旱至於夏秋七月庚午大雩於圜丘祁於宗社浙  
西南江東旱鎮江建康府常秀潭永州為甚四年五  
月不雨至於七月浙東西江西郡國旱開禧元年夏浙  
東西不雨百餘日衢婺嚴越鼎澧忠涪州大旱二年南  
康軍江西湖南北郡縣旱三年二月不雨五月己丑禱  
於郊丘宗社嘉定元年夏旱閏月辛卯禱於郊丘宗社

二年夏四月旱首種不入庚申禱於郊丘宗社六月乙酉又禱至於七月乃雨浙西大旱常潤為甚淮東西江東湖北皆旱四年資普昌合州旱六年五月不雨至於七月江陵德安漢陽軍旱八年春旱首種不入四月乙未禱於太乙宮庚子命輔臣分禱郊丘宗社五月庚申大雩於圜丘有事於嶽瀆海至於八月乃雨江浙淮閩皆旱建康寧國府衢婺溫台明徽池真太平州廣德興國南康盱眙安豐軍為甚行都百泉皆竭淮甸亦然十

年七月不雨帝日午曝立禱於宮中十一年秋不雨至  
於冬淮郡及鎮江建寧府常州江陰廣德軍旱十四年  
浙閩廣江西旱明台衢婺溫福贛吉州建昌軍為甚十  
五年五月不雨岳州旱嘉熙元年夏建康府旱三年旱  
四年江浙福建旱淳祐七年旱十一年閩廣及饒州旱  
咸淳六年江南大旱十年廬州旱長樂福清二縣大旱  
建隆中京師士庶及樂工少年競唱歌曰五來子自建  
隆開寶凡平荆湖川廣江西五國皆來朝時西川孟昶

賦斂無度射利之家配卒尤甚既乏緡錢唯仰在質物  
乃競書簡札揭於門曰今名主收贖又每歲除日命翰  
林為詞題桃符正旦置寢門左右末年學士辛寅遜撰  
詞祀以其非工自命筆題云新年納餘慶嘉節號長春  
祀以其年正月降王師即命呂餘慶知成都府而長春  
乃太祖誕聖節名也名與趙贊與蜀同音開寶初廣南  
劉鋕令民家置貯水桶號防火大桶又鋕末年童謡曰  
羊頭二四白天雨至後王師以辛未年二月四日擒鋕

識者以為國家以火德王房為宋分羊未神也雨者王  
師如時雨之義也防與房桶與宋同音周廣順初江南  
伏龜山圮得石函長二尺廣八寸中有鐵銘云維天監  
十四年秋八月葬寶公於是銘有引曰寶公嘗為偈大  
字書於版帛寡之人欲讀之者必施數錢乃得讀訖即  
寡之是時名士陸隱王鈞姚察而下皆莫知其旨或問  
之云在五百年後至卒乃歸其銘同葬焉銘曰莫問江  
南事江南自有馮乘雞登寶位跨犬出金陵子建司南

位安仁秉夜燈東隣家道闕隨虎遇明興其字皆小篆  
體勢完具徐鉉徐鏗韓熙載皆不能解及煜歸朝好事  
者云煜丁酉年襲位即乘鷄也開寶八年甲戌江南國  
滅是跨犬也當王師圍其城而曹彬營其南是子建司  
南位潘美營其北是安仁秉夜燭也其後太平興國三  
年淮海王錢倅舉國入覲即東隣也家道闕意無錢也  
隨虎遇戊寅年也皇祐五年正月戊午狄青敗儂智高  
于歸仁鋪初謠言農家種糴家收至是智高果為青所

破建炎三年四月鼎州桃源洞大水巨石隨流而下有文曰無為大道天知人情無為窈冥神見人形心言意語鬼聞人聲犯禁滿盈地收人魂金石同類類金為變恠者也紹興二年李綱帥長沙道過建寧僧宋本題邑治之壁曰東燒西燒日月七七後數日江西盜李仁入境焚其邑七月七日也淳熙中淮西競歌汪秀才曲曰騎驢渡江過江不得又為蹀舞以和之後舒城狂生汪格謀不軌州兵入其家縛之其子拒殺聚惡少數千為

亂聲言渡江事平格亦伏誅七年正月餘杭門外牆壁有詩其言頗涉恠後廉得主名杖遣之主管城北廂劉君暨以失察異言坐削秩其詩不錄十四年都城市井歌曰汝亦不來我家我亦不來汝家至紹熙二三年其事始應於兩宮紹定三年都城市井作歌詞末句皆曰東君去後花無主朝廷惡而禁之未幾太子詢薨慶元四年三月甲辰有郵箚置詩達御前者詔宰臣究其詩不錄嘉泰四年越人盛歌鐵彈子白塔湖曲俄有盜金

十一者自號鐵彈子繆傳其鬪死于白塔湖中後獲於諸暨縣

漢乾祐中荆南高從誨鑿池於山亭下得石匣長尺餘扃鐫甚固從誨神之屏左右焚香以啟匣中得石有文云此去遇龍即歇及建隆中從誨孫繼冲入朝改鎮徐州龍隆音相近太平興國中京師兒童以木雕合子中有竊藏匣下有聲號云腋底閘後盧多遜投荒人以為識其在肘腋而司國典也天禧二年五月西京訛言有

物如烏帽夜飛入人家又變為犬狼狀人民多恐駭每  
夕重閑深處至持兵器驅逐者六月乙巳傳及京師云  
能食人里巷聚族環坐叫譟達曙軍營中尤甚而實無  
狀意其妖人所為有詔嚴捕得數輩詢之皆非政和七  
年詔修神保觀俗所謂二郎神者京師人素畏之自春  
及夏傾城男女負土以獻揭榜通衢云某人獻土又有  
飾形作鬼使巡門催納土者或以為不祥禁絕之後金  
人幹離不圍京師其國謂之二郎君云紹興元年十二

月越州連火民訛言相驚月幾望當再火樞密院以軍  
法禁之乃定嘉定二年六月故循王張俊家火後旬日  
市井訛言相驚絳衣婦人為火殃下墮都民徙避晝夜  
弗寧禁之後亦不火慶元六年十月瓊州訛言妖星流  
墮民郭七家聲如雷通判曾丰暨瓊山縣令移文驚擾  
後皆坐絀簽書樞密院事林存為似道所擯道死于漳  
漳有富民蓄油玷木甚佳林氏子弟求之價高不可得  
因撫其木曰收取收取待賈丞相用德祐元年似道謫

死郡守與之經營竟得此木以發宋初陳搏有紙錢使  
不行之說時天下惟用銅錢莫喻此旨其後用交子會  
子其後會價愈低故有使到十八九紙錢飛上天之謠  
似道惡十九界之名乃名闕子然終為十九界矣而闕  
子價益低是紙錢使不行也宋以周顯德七年庚申得  
天下圖識謂過唐不及漢一汴二杭三閩四廣又有寒  
在五更頭之謠故宮漏有六更按漢四百二十餘年唐  
二百八十九年開慶元年宋祚過唐十一年滿五庚申

之數至德祐二年正月降附得三百一十七年而見六  
庚申如宮漏之數

建隆三年有象至黃陂縣匿林中食民苗稼又至安復  
襄唐州踐民田遣使捕之明年十二月於南陽縣獲之  
獻其齒革乾德二年五月有象至澧陽安鄉等縣又有  
象涉江入華容縣直過闢闔門又有象至澧州澧陽縣  
城北乾德四年八月普州免食禾五年有象自至京師  
雍熙四年有犀自黔南入萬州民捕殺之獲其皮角開

寶八年四月平陸縣鷺獸傷人遣使捕之生獻十頭十  
月江陵府白晝虎入市傷二人太平興國三年果闕蓬  
集諸州虎為害遣殿直張延鈞捕之獲百獸俄而七盤  
縣虎傷人延鈞又殺虎七以為獻七年虎入蕭山縣民  
趙馴家害八口淳化元年十月桂州虎傷人詔遣使捕  
之至道元年六月梁泉縣虎傷人二年九月蘇州虎夜  
入福山砦食卒四人咸平二年十二月黃州長析村二  
虎夜鬪一死食之殆半占云守臣災明年知州王禹偁

卒咸平六年十月乙酉有狐出皇城東北角樓歷軍器  
庫至夾道獲之大中祥符九年三月杭州浙江側晝有  
虎入稅塲巡檢俞仁祐揮戈殺之天聖九年五月宿州  
獲白兔六月廬州獲白兔明道二年六月唐州獲白兔  
皇祐三年十二月泰州獲白兔嘉祐三年六月丁卯交  
趾貢異獸二初本國稱貢麒麟狀如牛身被肉甲鼻端  
有角食生芻果必先以杖擊其角然後食既至而樞密  
使田况辨其非麟詔止稱異獸熙寧元年九月撫州獲

白兔十二月嵐州獲白鹿四年九月廬州獲白兔政和  
五年十二月安化軍獲白兔六月泰州軍獲白兔七年  
二月達州獲白兔宣和元年十月淄州獲黑兔宣和七  
年秋有狐由艮岳直入禁中據御榻而坐詔毀狐王廟  
紹興十一年海州屬金悉空其民安江後十二年有二  
虎入城人射殺之虎亦搏人明年魏勝舉州來歸亦空  
其民漢龔遂曰野獸入宮室宮室將空虎豕皆毛孽也  
十三年南康縣雷雨羣狐震死於巖穴中巖石皆為碎

二十二年劉彭老家貓產數子皆三尺乾道七年潮州  
野象數百食稼農設穿田間象不得食率其羣圍行道  
車馬斂穀食之乃去淳熙二年江州馬當山羣狐掠人  
十年滁州有熊虎同入樵民舍夜自相搏死紹熙元年  
三月臨安府民家猫生子一有八足二尾四年郢州武  
昌縣虎為人患五年八月揚州獻白兔侍御史章頴劾  
守臣錢之望以孽為瑞占曰國有憂白喪祥也是歲光  
宗崩慶元三年德興縣羣狐入民舍咸淳九年十一月

辛卯黎明有虎出於揚州市毛色微黑都撥發官曹安國率良家子數十人射之制置使李庭芝占曰千日之內殺一大將於是齧其肉於城外而厭之紹興六年四月中京大雪雷震犬數十爭赴土河而死可救者才二三淳熙元年六月饒州大雷震犬于市之旅舍慶元二年撫州有犬若人坐于郡守之坐未幾郡守林廷彥卒于官德祐元年五月壬申揚州禁軍民母得蓄犬城中殺犬數萬輸皮納官

乾德三年七月己卯夜西方起蒼白氣長五十尺貫天  
船五車亘井宿占曰主兵動六年十月己未旦西北起  
蒼白氣三道長二十尺趨東散占曰游兵之象太平興  
國四年四月己未夜西北有白氣壓北斗雍熙四年正  
月癸酉夜白氣起角亢經太微垣厯軒轅大星至月傍  
散至道二年二月丙子夜西方有蒼白氣長短八道如  
彗掃稍經天漢參錯如文蛇占曰所見之方主兵勝咸  
平四年三月丙申白氣二亘天五年正月白氣如虹貫

日久而散七月戊戌白氣如陣貫東井六年四月己巳  
白氣東西亘天丁丑白氣貫日五月辛亥白氣出昴至  
壁沒六月丙子白氣出河鼓左右旗分為數道沒七月  
癸卯白氣如彗起西南方占曰有兵喪景德元年五月  
白氣貫軒轅蒼白氣十餘如布亘天二年二月丁亥白  
氣五道貫北斗占為大風辛臣憂十月丙子白氣出閣  
道酉孛孛有光占曰宮中憂三年三月白氣貫月四年  
三月己未白氣東西亘天庚申白氣出南方長二丈許

久而不散四月庚午白氣貫北斗長十丈占為大風庚寅白氣如布襲月三丈許大中祥符元年正月丁丑白氣二東西亘天五年二月壬寅白氣長五丈出東井貫北斗魁及軒轅占為兵為雷雨明道元年十二月壬戌西北有蒼白氣亘天慶歷元年八月庚辰夜東方有白氣長十丈許在星宿度中至十日長丈餘衝天九十餘日沒二年八月甲申白氣貫北斗三年正月戊戌中天有白氣長二十尺向西南行貫日占曰邊兵憂四月癸

郊白氣二生西北隅上中天首尾至濁東南行良久散  
占曰其下有兵寇八月壬子夜白氣貫北斗魁九月辛  
巳夜中有白氣長二丈許貫卷舌南河東北行少頃散  
占曰風雨之候皇祐四年十一月辛酉夜白氣起北方  
近濁長五丈許歷北斗久之散占曰多大風嘉祐元年  
三月彭城縣白鶴鄉地生麪占曰地生麪民將饑五月  
鍾離縣地生麪治平二年四月丙午夜西北方有白氣  
漸東南行首尾至濁貫角宿移西北方散占曰有兵

戰疾疫事熙寧九年四月庚寅夜白氣長丈起東北方  
天市垣元祐三年七月戊辰夜西北有白氣經天主兵  
宜防西北二鄙元符二年九月戊辰夜有白氣十道各  
長五尺主兵及大臣黜崇寧二年五月戊子夜蒼白氣  
起東南方長三丈貫尾箕斗主蠻夷入貢舊臣來歸宣  
和三年九月壬午夜蒼白氣長三丈貫月主其下有亂  
者靖康元年十二月丙辰白氣出太微垣二年二月壬  
午夜白氣如虹自南亘北須臾移西南至東北天明而

沒三月戊子白氣貫斗建炎二年杜充為北京留守天  
雨紙錢千營中厚盈寸明日與金人戰城下敗績紙白  
祥也三年三月白氣貫日四年五月壬子夜北方有白  
氣十餘道如練二十六年七月辛酉夜天雨水銀紹興  
元年潭州得白玉于州城蓮花池中孔彥舟以獻詔却  
之前史以為玉變近白祥後彥舟為劇盜二月己巳夜  
東南有白氣十一年三月庚申金人居長安油酒皆變  
白色二十年十一月甲午夜西南有白氣出危入昴十

二月戊申白氣出尾入軫貫天市垣三十一年十二月  
辛丑白氣如帶東西亘天出斗厯牛隆興元年十二月  
壬午夜白氣見西南方出危入昴二年正月甲寅夜西  
南有白氣亘天如帶乾道元年正月庚午白氣見西北  
方出奎入參三月戊辰白氣如帶自參及角東西亘天  
四月丁酉夜白氣見西北方入天市垣辛丑夜白氣入  
壯斗乙巳夜白氣入紫微垣十月己丑夜蒼白氣見東  
南方入翼十一月丙寅白氣如帶出女入昴東西亘天

三年十二月庚午夜白氣如帶東西亘天出女入昴淳熙十年正月戊子夜西南有白氣如天漢而明南北廣可六丈東西亘天厯危至畢紹熙五年六月壬寅夜白氣亘天自紫微至亢角己酉日入後白氣亘天頃刻而散慶元四年八月庚辰白氣亘天五年二月癸酉夜東北方白氣如帶自角至參八月癸亥東北方有白氣如帶亘天嘉泰四年十一月辛未晝有白氣分數道亘天嘉熙四年二月丙辰白氣亘天淳祐二年二月甲寅白

氣亘天景定三年七月甲申白氣如匹布亘天咸淳三年襄陽城中白氣自西而出

紹興二年宣州有鐵佛像坐高丈餘自動迭前迭郤若僵而就人者數日既而郡有火火氣盛金失其性而為變恠也七月天雨錢或從石甃中流出有輪郭肉好不分明穿之碎若沙土二月溫州戒福寺銅佛像頂珠自動光彩激射經日不少停數日火作寺焚淳熙九年春德興縣民家鏡自飛舞與日光相射慶元二年正月泰

寧縣耕夫得鏡厚三寸徑尺有二寸照見水底與日爭輝病熱者對之心骨生寒後為雷震而碎

宋史卷六十六

宋史卷六十六考證

五行志四金舊說以僭谷恒陽○陽應作暘

紹興十一年海州屬金悉空其民○臣召南按此條前

文已見而複出者也但不追叙十年有野豕入海州

市民刺殺之則下文無根

乾德三年七月己卯夜西方起蒼白氣云云○按此段

往往與天文志相參錯

宋史卷六十六考證

欽定四庫全書  
會要卷五千六百九十五

史部

宋史卷六十七

元中書右丞相總裁托克托等修

五行志第二十

五行五

土

稼穡作甘土之性也土失其性則為災凶舊說以恒風  
脂夜之妖華孽羸蟲之孽牛禍黃眚黃祥皆屬之土今  
從之

建隆元年河南諸州乏食乾德元年齊隰等州饑二年  
州府二十二饑開寶四年州府六水一旱諸州民乏食  
五年大饑六年水民饑九年州府十二饑太平興國四  
年太平州饑淳化元年開封河南等九州饑五年京東  
西淮南陝西水潦民饑咸平五年河北及鄭曹滑饑景  
德元年江南東西路饑二年淮南兩浙荆湖北路饑三  
年京東西河北陝西饑大中祥符三年陝西饑四年河  
北陝西麌南饑五年河北淮南饑七年淮南江浙饑八

年陝西州府五饑天禧元年饑三年江浙及利州路饑  
天聖三年晉絳陝解饑明道元年京東淮南江東饑二  
年淮南江東西川饑寶元二年益梓利夔路饑嘉祐三  
年夔州路旱饑熙寧三年河北陝西旱四年河北旱饑  
六年淮南江東効南西川閨州饑七年京畿河北京東  
西淮西成都利州延常閨府州威勝保安軍饑八年兩  
河陝西江南淮浙饑九年雄州饑十年漳泉州興化軍  
饑元豐元年河北饑四年鳳翔府鳳階州饑七年河東

饑元符二年饑崇寧元年江浙熙河饑大觀三年秦鳳  
階成饑重和元年京西饑五年河北京東淮南饑建炎  
元年汴京大饑米升錢三百一鼠直數百錢人食水藻  
椿槐葉道殣骼無餘皆三年山東郡國大饑人相食時  
金人陷京東諸郡民聚為盜至車載乾尸為糧紹興元  
年行在越州及東南諸路郡國饑淮南京東西民流常  
州平江府者多殍死二年春兩浙福建饑米斗千錢時  
餌餳繁急民益藉食三年吉郴道州桂楊監饑五年湖  
贛饑饑急民益藉食

南大饑殍死流亡者衆夏潼川路饑米斗二千人食糟糠興元饑民流于果闌秋溫處州饑六年春浙東福建饑湖南江西大饑殍死甚衆民多流徙郡邑盜起夏蜀亦大饑米斗二千利路倍之道殣枕藉是歲果州守臣宇文彬獻禾粟九穗圖吏部侍郎晏敦復言果遂饑民未蘇不宜導諛坐黜爵七年夏欽廉邕州饑九年江東西浙東饑米斗千錢饒信州尤甚十年浙東江南荐饑人食草木十一年京西淮南饑十八年冬浙東江淮郡

國多饑紹興尤甚民之仰哺于官者二十八萬六千人  
不給乃食糟糠草木殍死殆半十九年春夏紹興府大  
饑明婺州亦如之二十四年衢州饑二十八年平江府  
饑二十九年紹興府荐饑隆興元年紹興府大饑四川  
尤甚平江襄陽府隨泗州棗陽盱眙軍大饑隨棗間米  
斗六七十二年平江府常秀州饑華亭縣人食粬糠行  
都及鎮江府興化軍台徽州亦艱食淮民流徙江南者  
數十萬乾道元年春行都平江鎮江紹興府湖常秀州

大饑殍徙者不可勝計是歲台明州江東諸郡皆饑夏  
亡麥二年夏亡麥三年九月不雨麥種不入四年春蜀  
印綿劖漢州石泉軍大饑印為甚盜延八郡漢饑民至  
九萬餘五年夏饑信州荐饑民多流徙徽州大饑人食  
蕨葛台楚州盱眙軍亦饑秋冬不雨淮郡麥種不入六  
年冬寧國府廣德軍太平湖秀池徽和州皆饑七年秋  
江東西湖南十餘郡饑江筠州隆興府為甚人食草實  
流徙淮甸詔出內帑收育棄孩淮郡亦荐饑金人運麥

於淮北岸易南岸銅鑑斗錢八千江西饑流光濱安豐  
間皆效淮人私鑄錢為之耗荆南亦饑八年江西亡麥  
隆興府荐饑南昌新建縣饑民仰給者二萬八千餘九  
年春成都永康印三州饑秋台州饑溫婺州亦饑淳熙  
元年浙東湖南廣西江西蜀關外皆饑台處郴桂昭賀  
尤甚二年淮東西江東饑滁真揚州盱眙軍建康府為  
甚是歲鎮江寧國府常州廣德軍亦艱食詔獎建康留  
守劉珙振濟有方三年淮甸饑夏台州亡麥冬復施隨

郢州荆門軍襄陽江陵德安府大饑四年春尤饑六年  
冬和州饑通泰楚州高郵軍大饑人食草木七年鎮江  
府台州無為廣德軍民大饑是歲江浙荆湘淮郡皆饑  
八年春江州饑人采葛而食詔罷守臣章驛冬行都寧  
國建康府嚴婺太平州廣德軍饑徽饒州大饑流淮郡  
者萬餘人浙東常平使者朱熹進對論荒政請蠲田賦  
身丁錢詔江浙淮湖北三十八郡並免之九年春大亡  
麥行都饑於潛昌化縣人食草木紹興府衢婺嚴明台

湖州饑徽州大饑種稑亦絕湖北七郡荐饑蜀潼利夔  
三州郡國十八皆饑流徙者數千人十年合昌州荐饑  
民就振相踪死者三千餘人十一年泉汀漳州興化軍  
亡禾邕賓象州饑十二年福建饑亡麥江西廣東西饑  
金州饑有流徙者十四年金洋階成鳳西和州人乏食  
七月秀州饑有流徙者臨安府九縣饑十六年夏成州  
亡麥冬階成鳳西和州荐饑紹熙二年蘄州饑夔路五  
郡饑渝涪為甚階成鳳西和州亡麥三年資榮州亡麥

普叙簡隆州富順監皆大饑亡麥殍死者衆民流成都府至千餘人威遠縣棄兒且六百人揚州亦多饑四年簡資普州饑縣州亡麥夏紹興府亡麥安豐軍大亡麥五年冬亡麥苗行都淮浙西東江東郡國皆饑常明州寧國鎮江府廬滁和州為甚人食草木慶元元年春常州饑民之死徙者衆楚州饑人食糟粕淮浙民流行都三年浙東郡國亡麥台州大亡麥民饑多殍襄蜀亦饑四年秋浙東西荐饑多道殣六年冬常州大饑仰哺者

六十萬人潤揚楚通泰州建康府江陰軍亦乏食嘉泰  
元年浙西郡國荐饑常州鎮江嘉興府為甚二年四川  
饑廣安淮安軍潼川府大亡麥衡郴州武岡桂陽軍乏  
食三年春邵永州大饑死徙者衆民多剽盜夏行都艱  
食四年春撫袁州隆興府臨江軍大饑殍死者不可勝  
瘞有舉家二十七人同赴水死者開禧二年紹興府衢  
婺州亡麥湖北京西淮東西郡國饑民聚為剽盜南康  
軍忠涪州皆饑嘉定元年淮民大饑食草木流于江浙

者百萬人先是淮郡罹兵農久失業米斗二千殍死者  
十三四炮人肉馬矢食之詔所至郡國振恤歸業時邦  
儲既匱郡計不支去者多死亦有俘掠而北者是歲行  
都亦饑米斗千錢二年春兩淮荆襄建康府大饑米斗  
錢數千人食草木淮民剗道殣食盡發瘞齒繼之人相  
抵噬流於揚州者數千家度江者聚建康殍死者八九  
十人是秋諸路復大歉常潤尤甚冬行都大饑殍者橫  
市道多棄兒三年春建康府大饑人相食五月衢州饑

頗聚為剽盜七年台州大亡麥八年淮浙江東西饑都  
昌縣為盜者三十六黨九年行都饑閭巷有殍十年台  
衢婺饑信州饑剽盜起台為甚蜀石泉軍饑殍死殆萬  
餘人十一年淮浙江東饑饉亡麥苗十二年春潼川府  
饑而不害十三年春福州饑人食草根十六年春海州  
新附山東民饑京東河北路新附山西民亦饑湖南永  
道州大饑是歲行都江淮閩浙郡國皆亡麥禾十七年  
春餘杭錢塘仁和三縣饑鎮江府饑真鄆州亦乏食嘉

熙四年紹興府荐饑臨安府大饑嚴州饑咸淳七年江

南大饑八年冬襄陽饑人相食德祐二年正月揚州饑

三月揚州穀價騰踴民相食

乾德二年五月揚州暴風壞軍營舍僅百區三年六月

揚州暴風壞軍營舍及城上敵棚開寶二年三月帝駐

太原城下大風一夕而止八年十月廣州颶風起一晝

夜雨水二丈餘海為之漲飄失舟檝九年四月宋州大

風壞甲仗庫城樓軍營凡四千五百九十六區太平興

國二年六月曹州大風壞濟陰縣廨及軍營四年八月  
泗州大風浮梁竹筈鐵索斷華表石柱折六年九月高  
州大風雨壞廨宇及民舍五百區七年八月瓊州颶風  
壞城門州署民舍殆盡八年九月太平軍颶風拔木壞  
廨宇民舍千八十七區十月雷州颶風壞廩庫民舍七  
百區九年八月白州颶風壞廨宇民舍端拱二年京師  
暴風起東北塵沙曠日人不相辨淳化二年五月通利  
軍大風害稼三年六月丁丑黑風自西北起天地晦暝

雷震有頃乃止先是京師大熱疫死者衆及北風至疫  
疾乃止至道二年八月潮州颶風壞州廨營砦咸平元  
年八月涪州大風壞城舍四年八月丙子京師暴風景  
德二年六月甲午大風吹沙折木八月福州海上有颶  
風壞廬舍三年七月丙寅京師大風四年三月甲寅夕  
京師大風黃塵蔽天自大名歷京畿害桑稼唐州尤甚  
大中祥符二年四月乙未大風起京師西北連日不止  
五年八月京師大風七年三月戊辰京師大風揚沙礫

是日百官習儀恭謝壇有陷仆者八年六月辛亥京師  
風起已位吹沙揚塵天禧二年正月永州大風發屋拔  
木數日止三年五月徐州利國監大風起西南壞廬舍  
二百餘區壓死十二人四年四月丁亥大風起西北飛  
沙折木晝晦數刻五月乙卯暴風起西北有聲折木吹  
沙黃塵蔽天占並主陰謀姦邪是秋內侍周懷政坐妖  
亂伏誅天聖九年十二月辛酉大風三日止景祐元年  
六月己巳無錫縣大風發屋民被厭死者衆九月甲寅

夜漏上風自丑起有聲擺木鳴條二年六月戊寅平明  
風自未來占者以為百穀豐衍之候皇祐四年七月丁  
巳大風起西北方拔木嘉祐二年正月元日平旦有風  
從東北來徧天有蒼黑雲占云大熟多雨熙寧四年二  
月辛巳京東自濮州至河北旁邊大風異常百姓驚恐  
六年四月館陶縣黑風九年十一月海陽潮陽二縣颶  
風潮害民居田稼十年六月武城縣大風壞縣廨知縣  
李愈妻主簿寇宗奭妻之母壓死七月溫州大風雨漂

城樓官舍元豐四年六月邕州颶風壞城樓官私廬舍  
七月甲午夜泰州海風作繼以大雨浸州城壞公私廬  
舍數千間靜海縣大風雨毀官私廬舍二千七百六十  
三楹丹陽縣大風雨溺民居毀廬舍丹徒縣大風潮飄  
蕩沿江廬舍損田稼六月邕州颶風壞城樓官私廬舍  
五年六月朱崖軍颶風毀廬舍元祐八年福建兩浙海  
風駕潮害民田紹聖元年秋蘇湖秀等州有風害民田  
靖康元年正月望夜大風起西北有聲吹沙走石盡明

日乃止二月戊申大風起東北揚塵翳空三月己巳夜  
五更大風乍緩乍急聲如呌怒十一月丁亥大風發屋  
折木閏十一月甲寅大風起北方雪作盈數尺連夜不  
止二年正月己亥天氣昏曠狂風迅發竟日夜西北陰  
雲中如有火光長二丈餘濶數尺民時時見之庚戌大  
風雨二月乙酉大風折木晚尤甚三月己亥大風四月  
庚申朔大風吹石折木辛酉北風益甚苦寒建炎元年  
正月丁酉大風吹石折木十二月乙酉大風拔木紹興

二十八年七月壬戌平江府大風雨駕潮漂溺數百里  
壞田廬三十二年七月戊申大風拔木溫州大風壞屋  
覆舟隆興元年浙東西郡國風水傷稼三年八月大風  
雨漂蕩田廬乾道二年八月丁亥溫州大風雨駕海潮  
殺人覆舟壞廬舍五年十月台州大風水壞田廬八年  
六月丙辰惠州颶風壞海艦三十餘時樞密院調廣東  
經畧司水軍四艦覆其三死者百三十餘人淳熙三年  
六月大風連日四年九月明州大風駕海潮壞定海鄞

縣海岸七千六百餘丈及田廬軍壘六月乙巳夜福清  
縣興化軍大風雨壞官舍民居倉庫及海口鎮人多死  
者五年正月庚戌大風六年十一月鄂州大風覆舟溺  
人甚衆七年二月江陵府大風火及舟焚溺死者尤衆  
十年八月辛酉雷州颶風大作駕海潮傷人禾稼林木  
皆折紹熙二年三月癸酉瑞安縣大風壞屋拔木殺人  
四年七月興化軍海風害稼五年六月丙子大風七月  
乙亥行都大風拔木壞舟甚衆紹興府秀州大風駕潮

害稼秋明州颶風駕海潮害稼十月戊戌行都大風拔木慶元二年六月壬申台州暴風雨駕海潮壞田廬六年三月甲子大風拔木嘉泰三年十月丁未暴風十一月癸未大風四年正月乙亥亦如之開禧元年四月乙卯九月庚戌大風嘉定元年九月乙丑大風二年二月戊子大風七月壬辰台州大風雨駕海潮壞屋殺人三年八月癸酉大風拔木折禾穗墮果實寧宗露禱至于丙子乃息後御史朝陵于紹興府歸奏風壞陵殿宮牆

六十餘所陵木二千餘章四年閏月丁未大風六年十  
二月餘姚縣風潮壞海堤亘八鄉七年正月庚辰江州  
放鎧黑雲暴風忽作遊人相踐死者二十餘十年正月  
乙未大風拔木十一月丁丑大風十一年二月甲寅大  
風十月戊午大風十三年十一月庚戌壬子大風十二  
月戊午大風十四年六月辛巳大風十六年秋大風拔  
木害稼十七年秋福州颶風大作壞田損稼冬鄂州暴  
風壞戰艦二百餘艘昌寧壞戰艦六十餘江州興國亦

如之嘉熙二年風雹三年風雹淳祐十一年泰州風景  
定四年十一月福州颶風咸淳四年閏月丁巳大風雷  
兩居民屋瓦皆動七年五月甲申紹興府大風十年四  
月紹興府大風拔木

端拱二年京師暴風起東北塵沙曠日人不相辨淳化  
三年六月丁丑黑風自西北起天地晦冥雷震有頃乃  
止大中祥符二年九月無為軍城北暴風晝晦不可辨  
拔木壞城門營壘民舍天聖六年二月庚辰大風晝暝

康定元年三月丙子大風晝暝經刻乃復嘉祐八年十一月丙午大風霾治平二年二月乙巳大風晝晦四年正月庚辰朔大風霾是日上尊號廷中仗衛皆不能整時帝已不豫後七日崩熙寧四年四月癸亥京師大風霾元祐八年二月京師風霾靖康二年正月己亥天氣昏曠風迅發竟日三月丁酉風霾建炎元年正月辛卯朔大風霾丁酉風霾日色薄而有暈二月丁酉汴京風霾日無光是日張邦昌僭位二年七月癸未風雨晝晦

是日東京留守宗澤薨紹興十一年三月庚申金人居長安晝晦乾道五年正月甲申晝霾四塞淳熙五年四月丁丑塵霾晝晦日無光慶元九年十二月乙未天雨霾開禧元年正月壬午雨霾嘉定十年正月乙未晝霾二月癸巳日無光德祐元年六月庚子朔日有食之既天地晦冥咫尺不辨人雞鶩歸棲自巳至申其明始復至道二年秋九月環慶州梨生花占有兵明年契丹擾北邊景德元年二月保順軍城壞水陷起文為桃李花

雜樹人物之狀大中祥符九年正月壩州渠水有如華  
葩狀大觀二年十月乙巳龔丘縣檜生花萼如蓮實紹  
興七年十二月中書門下省檢正官張宗元出撫淮西  
軍寓建康槃冰有文如畫佳卉茂木華葉相敷日易以  
永變態奇出春暄乃止二十七年四月徽州祁門縣圃  
桃已實復華淳熙初秀州呂氏家冰瓦有文樓觀車馬  
人物芙蓉牡丹萱草藤蘿之屬經日不釋淳熙中興化  
軍仙遊縣九巫山古木末生花臭如蘭

建隆二年九月渭南縣野妨蟲傷稼三年七月兗州濟德磁洺蠽生乾德六年七月階州野妨蟲生太平興國二年六月磁州青黑蟲羣飛食桑夜出晝隱食葉殆盡七月邢州鉅鹿沙門二縣步屈蟲食桑麥殆盡五年七月濰州野妨蟲生食稼殆盡七年九月邠州野妨蟲生食稼九年七月泗州蠻蟲食桑熙二年四月天長軍蠻蟲食苗端拱二年七月施州野妨蟲生害稼淳化二年四月中都縣蠐蟲生七月單州蠐蟲生遇雨死景德

元年八月陝賓棣州蟲螟害稼大中祥符四年八月兗  
州野蚜蟲生有蟲青色隨醬之化為水六年九月陝西  
同華等州野蚜蟲食苗天聖五年五月戊辰磁州蟲食  
桑景祐四年五月滑州靈河縣民黃慶家蠶自成被長  
二丈五尺濶四尺嘉祐五年深州野蠶成蠅被于原野  
熙寧九年五月荆湖南路地生黑蟲化蛾飛去金州生  
黑蟲食苗黃雀來食之皆盡元祐六年閏八月定州七  
縣野蠶成蠅七年五月北海縣蠶自織如絹成領帶元

符元年七月藁城縣野蠶成蠶八月行唐縣野蠶成蠶九月深澤縣野蠶成蠶織絍成萬匹二年六月房陵縣野蠶成蠶政和元年九月河南府野蠶成蠶四年相州野蠶成蠶五年南京野蠶成蠶織絍五匹綿四十兩聖蠶十五兩紹興二十九年秋浙東江東西郡縣螟三十一年十月江浙郡國螟蠣隆興元年秋浙東西郡國螟害穀紹興府湖州為甚三年台州螟乾道三年八月江東郡縣螟賸淮浙諸路多言青蟲食穀穗六年秋浙江江

東螟爲害九年秋吉贛州臨江安南軍螟淳熙二年秋  
浙江淮郡縣螟四年秋昭州螟五年昭州荐有螟螣七  
年秋永州螟八年秋江州螟十二年八月平江府有蟲  
聚于禾穗油酒之即墮一夕大雨盡滌之十四年秋江  
州興國軍螟十六年秋溫州螟慶元三年秋浙東蕭山  
山陰縣婺浙西富陽鹽官淳安與永興縣嘉興府皆螟  
四年秋鉛山縣蟲食穀無遺穗嘉定十四年明台溫婺  
衢蟲螣為災十五年秋贛州螟十六年永道州螟紹定

三年福州螟端平元年五月當塗縣螟淳祐二年五月  
兩淮螟景定三年八月浙東西螟

乾德三年眉州民王進牛生二犢四年南充縣民馬全  
信及相如縣民彭秀等家牛生二犢開寶二年九龍縣  
民王達牛生二犢太平興國三年流溪縣民白延進牛  
生二犢五年溫江縣民趙進牛生二犢六年廣都縣趙  
全牛生二犢七年什邡縣民王信華陽縣民袁武等牛  
生二犢八年彭州民彭延閬州民陳則安樂縣民王公

泰牛生二犢九年七月知乾州衛昇獻三角牛雍熙三年果州民李昭牛生二犢四年鄭縣民鮮于志鮮于舉眉山縣海羅參仁壽縣民陰饒成都縣民李本成紀縣民王和敏牛生二犢端拱元年眉州民陳希簡晉原縣民張昭郁魏城縣民鮮于韶羅江縣民袁旅河陽縣民李美曲水縣民曾處梓潼縣民文光懿永泰縣民羅德綿竹縣民陳洪牛生二犢淳化元年綿竹縣民李昌遠薄逸閩州民和中惠州民王欽眉州民王圖九龍縣民

楊皋玄武縣民羊邁達牛生二犢二年永州縣民梁行  
良仁壽縣民梁仁超牛生二犢三年成都府民彭齊卿  
洪雅縣民程讓永昌縣民田昭巴州民杜文宥廬山縣  
民白閏牛生二犢四年成都府民任順曲水縣民張思  
方彭山縣民李承遠牛生二犢至道二年新都縣民蹇  
成美牛生二犢潁陽縣民馮延密牛生三犢其二額有  
白三年新津縣民文承富赤水縣民蘇福廣安軍吏胥  
仁迪牛生二犢咸平元年眉山縣民向瓊玖陳元寶丹

陵縣民劉承鶴通泉縣民王居中曲水縣民楊漢成楊  
景歡王思讓眉山縣民陳彥宥牛生二犢二年濛陽縣  
民杜擎九隴縣民楊太眉山縣民蘇仁義洪雅縣吏陸  
文贊牛生二犢三年叙浦縣民戴昌蘊牛生二犢四年  
流溪縣民何承添晉原縣民頗全永昌縣民曾嗣犀浦  
縣民何福彰明縣民王玘牛生二犢六年渠江縣民王  
德進魏城縣民蒲諫王信石照縣民仲漢宗大足縣民  
劉武牛生二犢景德元年魏城縣民閻明彭州濛陽縣

民郭琮牛生二犢二年三泉縣民李景順東海縣民時祐小溪縣民劉可赤水縣民羅永並牛生二犢三年長江縣民于承琛牛生二犢四年相如縣民楊漢暉印州安仁縣民羅瑩九龍縣民白彥成渠江縣民王繼豐家及順安軍屯田務牛生二犢大中祥符元年龔丘縣民李起牛生二犢判州王欽若圖以獻二年立山縣民盧仁依銅山縣民勾熙正什邡縣民杜族南康縣民陳邦並牛生二犢三年犍為縣民陳知進牛生二犢四年東

關縣民陳知進牛生二犢五年富順監些井場官楊守  
忠曲水縣民向平蓬溪縣民蹇知密牛生二犢六年廣  
安軍依政縣民李福貴溪縣民徐志元牛生二犢七年  
雙流縣民姚彥信涪城縣民張禮嘉州龍游縣民張正  
夾江縣民郭昇天水縣民王吉牛生二犢八年仁壽縣  
民何志通泉州縣民羅永泰成都縣民張進華陽縣民楊  
承珂牛生二犢九年平定軍平定縣民范訓臨印縣民  
楊暉牛生二犢天禧元年開江縣民冉津及澧州石門

縣層山縣牛生二犢二年臨印縣民王道進臨溪縣民  
王勝西縣民韓光緒牛生二犢四年貴溪縣民葉政牛  
生二犢五年巴西縣民向知道牛生二犢自天聖迄治  
平牛生二犢者三十二生三犢者一自熙寧二年距元  
豐八年郡國言民家牛生二犢者三十有五生三角者  
一元祐元年距元符三年郡國言民家牛生二犢者十  
有五大觀元年閩州達州言牛生二犢四年三月帝謂  
起居舍人宇文粹中曰牛產二犢亦載之起居注中豈

若野蠶成蠶之類民賴其利乃為瑞邪自是史官不復  
盡書政和五年七月安武軍言郡縣民范濟家牛生麒麟  
重和元年三月陝州言牛生麒麟宣和二年十月尚  
書省言歙州歙縣民鮑珙家牛生麒麟三年五月梁縣  
民邢喜家牛生麒麟紹興元年紹興府有牛戴刃突入  
城市觸馬裂腹出腸時衛卒多犯禁屠牛牛受刃而逸  
近牛禍也十六年靜江府城北二十里有奔犢以角觸  
人於壁腸胃出牛狂走兩日不可執卒以射死十八年

五月依政縣牛生二犢二十一年七月遂寧府牛生二犢者三二十五年八月漢中牛生二犢淳熙十二年仁和縣良渚有牛生二首七日而死餘杭縣有犢二首十六年三月池州池口鎮軍屯牛狂走觸人死慶元三年樂平縣田家牛生犢如馬一角鱗身肉尾農以不祥殺之或惜其為麌同縣萬山牛生犢人首

淳化三年正月乙卯京師雨土占曰小人叛自後李順盜據益州景德元年七月辛亥黃氣出壁長五尺餘占

曰兵出二年正月丙寅黃白氣環之大中祥符元年正  
月癸亥朔黃氣出於艮占曰主五穀熟二年九月戊午  
黃氣如柱起東南方長五丈許天禧五年襄州鳳林鎮  
道側地涌起高三尺濶八尺知州夏竦以聞明道元年  
十月庚子夜黃白氣五貫紫微垣景祐元年八月壬戌  
夜有黃白氣如彗長七尺餘出張翼之上凡三十有三  
日不見治平元年三月壬戌雨土十二月己亥雨黃土  
熙寧五年十二月癸未七年三月戊午並雨黃土八年

五月丁丑雨黃土兼細毛元豐二年十一月丁亥五年  
三月乙巳六年四月辛未雨土元祐七年正月戊午天  
雨塵土主民勞苦宣和元年三月庚午雨土著衣主不  
肖者食祿紹興十一年三月庚申涇州雨黃沙十八年  
十一月壬辰肆赦天有雲赤黃近黃祥也太史附秦檜  
旨奏瑞乾道四年三月己丑雨土若塵淳熙四年二月  
戊戌雨土五年二月壬午甲申四月丁丑六年十一月  
乙丑十一年正月辛卯甲寅十三年正月壬寅亦如之

十五年九月庚子南方有赤黃氣紹熙四年十月甲寅  
雨土五年四月癸卯亦如之十月乙未天有黃赤色占  
曰是為天變色先赤後黃近黃赤祥也十一月辛亥雨  
土慶元元年二月己卯十一月己丑天雨塵土三年正  
月丙子四月丙午十二月甲申天雨塵土六年正月己  
巳閏月丁未十月己丑雨土九月辛丑十一月辛卯天  
雨塵土嘉泰元年六月己卯九月己未十二月辛丑天  
雨塵土嘉定三年正月丙午天雨塵土八年二月己未

五月辛未天雨塵土九年十二月癸巳天雨土十年二月癸巳雨土十二年二月癸巳天雨塵土十三年二月辛卯天雨塵土十六年二月戊子天雨塵土紹定三年三月丁酉雨土嘉熙二年四月甲申雨土三年三月辛卯天雨塵土淳祐五年二月丙寅朔天雨塵土十一年五月乙亥天雨塵土寶祐三年三月己未雨土六年二月壬辰天雨塵土開慶元年三月辛酉雨土景定五年二月辛未雨土德祐元年三月辛巳終日黃沙蔽天或曰

喪氣

乾德三年京師地震

史失日月

五年十一月許州開元觀老

君像自動知州宋偓以聞六年正月簡州普通院毗盧

佛像自動至道二年十月潼關西至靈州夏州環慶等

州地震城郭廬舍多壞占云兵饑是時西夏寇靈州明

年遣將率兵援糧以救之關西民饑咸平二年九月常

州地震壞鼓角樓羅務軍民廬舍甚衆四年九月慶州

地震者再六年正月益州地震景德元年正月丙申夜

京師地震癸卯夜復震丁未夜又震屋皆動有聲移時  
方止癸丑冀州地震占云土工興有急令兵革興是時  
契丹犯塞二月益黎雅州地震三月邢州地震不止四  
月己卯夜瀛州地震五月邢州地復震不止十一月壬  
子日南至京師地震癸丑石州地震四年七月丙戌益  
州地震己丑渭州瓦亭砦地震者四大中祥符二年三  
月代州地震四年六月昌眉州並地震七月真定府地  
震壞城壘天聖五年三月泰州地震七年京師地震景

祐四年十二月甲子京師地震甲申忻代并三州地震  
壞廬舍覆壓吏民忻州死者萬九千七百四十二人傷  
者五千六百五十五人畜擾死者五萬餘代州死者七  
百五十九人并州千八百九十人寶元元年正月庚申  
并忻代三州地震十二月甲子京師地震慶歷三年五  
月九日忻州地大震說者曰地道貴靜今數震搖兵興  
民勞之象也四年五月庚午忻州地震西北有聲如雷  
五年七月十四日廣州地震六年二月戊寅青州地震

三月庚寅登州地震岠嵎山摧自是震不已每震則海底有聲如雷五月甲申京師地震七年十月乙丑河陽許州地震皇祐二年十一月丁酉夜秀州地震有聲自北起如雷嘉祐二年雄州北界幽州地大震大壞城郭覆壓者數萬人五年五月己丑京師地震治平四年秋漳泉州邵武興化軍等處皆地震潮州尤甚折裂泉浦壓覆州郭及兩縣屋宇士民軍兵死者甚衆八月己巳京師地震熙寧元年七月甲申地震乙酉辛卯再震

八月壬寅甲辰又震是月湏城東阿二縣地震終日滄  
州清池莫州亦震壞官私廬舍城壁是時河北復大震  
或數刻不止有聲如雷樓櫓民居多摧覆壓死者甚衆  
九月戊子莫州地震有聲如雷十一月乙未京師及莫  
州地震十二月癸卯瀛州地大震丁巳冀州地震辛酉  
滄州地震湧出沙泥船板胡桃螺蚌之屬是月潮州地  
再震是歲數路地震有一日十數震有踰半年震不止  
者二年十月庚戌南郊東壇門內地陷有天寶十三年

古墓元豐元年邕州佛像動搖初像動夏人入寇又動而州大火其後儂智高叛復動於是知州錢師孟投其像於江中八年二月甲戌賓州嶺方縣地陷五月丙午京師地震元祐二年二月辛亥代州地震有聲四年春陝西河北地震七年九月己酉蘭州鎮戎軍永興軍地震十月庚戌朔環州地再震紹聖元年十一月丙戌太原府地震二年十月十一月河南府地震是歲蘇州自夏迄秋地震十三年三月戊戌夜劔南東川地震九月

己酉滁州沂州地震四年六月己酉太原府地震有聲  
元符元年七月壬申夜雲露蔽天地震良久二年正月  
壬申恩州地震八月甲戌太原府地震三年五月己巳  
太原府又震建中靖國元年十一月辛亥太原府潞晉  
縣代石嵐等州岢嵐威勝保化寧化軍地震彌旬晝夜  
不止壞城壁屋宇人畜多死自後有司方言祥瑞郡國  
地震多抑而不奏政和七年六月詔曰熙河環慶涇原  
路地震經旬城砦關堡城壁樓櫓官私廬舍並皆摧塌

居民覆壓死傷甚衆而有司不以聞其遣官按視之宣  
和四年北方用兵雄州地大震玄武見於州之正寢有  
龜大如錢蛇若硃漆筋相逐而行宣撫使焚香再拜以  
銀奩貯二物俄俱死六年正月京師連日地震宮殿門  
皆動有聲七年七月己亥熙河路地震有裂數十丈者  
蘭州尤甚陷數百家倉庫俱沒河東諸郡或震裂建炎  
二年正月戊戌長安地大震金將婁宿圍城彌旬無外  
援乘地震而入城遂陷紹興三年八月甲申地震平江

府湖州尤甚是歲劉豫陷鄧隨等州金人犯蜀四年四  
川地震五年五月行都地震六年六月乙巳夜地震自  
西北有聲如雷餘杭縣為甚是歲劉麟貌犯順寇濠壽  
州七年地震二十四年正月戊寅地震二十五年三月  
壬申地震二十八年八月甲寅夜震三十一年三月壬  
辰地震三十二年七月戊申地震隆興元年十月丁丑  
地震六月甲寅又震乾道二年九月丙午地震自西北  
方四年十二月壬子石泉軍地震三日有聲如雷屋瓦

皆落時綿竹有寃獄云淳熙元年十二月戊辰地震自  
東北方九年十二月壬寅夜地震十年十二月丙寅地  
震十二年五月庚寅地震慶元六年九月東北地震十  
一月甲子地震東北方嘉定六年四月行都地震六月  
丙子淳安縣地震九年二月辛亥東西川地大震四日  
十年二月庚申地震自東南十二年五月地震六月西  
川地震十四年正月乙未夜地震大雷五月丙申西川  
地震寶慶元年八月己酉地震嘉熙四年十二月丙辰

地震淳祐元年十二月庚辰夜地震寶祐三年蜀地震

咸淳七年嘉定府城震者三

雍熙三年階州福津縣常峽山圮壅白江水逆流高丈許壞民田數百里淳化二年五月名山縣大風雨登遼山圮壅江水逆流入民田害稼咸平元年七月庚午寧化軍汾水漲壞北水門山石摧圯軍士有壓死者二年七月庚寅靈寶縣暴雨崖圯壓居民死者二十二戶三年三月辛丑夜大澤縣三陽砦大雨崖摧壓死者六

十二人四年正月成紀縣山摧壓死者六十餘人景德  
四年七月成紀縣崖圮壓死居民天禧五年九月丙寅  
華州少華山前阜頭峰越八盤領及谷摧陷于石子坡  
東西五里南北十里潰散墳裂湧起堆阜各高數丈長  
若隄岸至陷居民六社凡數百戶林木廬舍亦無存者  
並山之民言數年以來峰上常有雲每遇風雨即隱隱  
有聲是夜初昏畧無風雨山上忽霧起有聲漸大地遂  
震動不及食頃而山摧元祐元年十二月鄭縣界小敷

谷山摧傷居民紹興十二年十二月陝西不雨五穀焦  
枯涇渭灞滻皆竭時秦民以饑離散壯者為北人所買  
郡邑遂空紹熙四年秋南嶽祝融峰山自摧劔門關山  
摧五年十二月臨安府南高峰山自摧慶元二年六月  
辛未台州黃巖縣大雨水有山自徙五十餘里其聲如  
雷草木冢墓皆不動而故址潰為淵潭時臨海縣清渾  
山亦自移嘉泰二年七月丁未閩建安縣山摧民廬之  
壓者六十餘家嘉定六年六月丙子嚴州淳安縣長樂

鄉山摧水湧九年黎州山崩咸淳十年天目山崩熙寧  
元年荆襄間天雨白斂如馬尾長者尺餘彌漫山谷三  
月丁酉潭州雨毛八年五月丁丑雨黃毛紹熙四年十  
一月癸酉地生毛咸淳九年江南平地產白毛臨安尤  
多

宋史卷六十七

宋史卷六十七考證

五行志五土閩州饑○閩州應作潤州

端拱二年京師暴風起東北云云○臣召南按此條及

淳化三年六月丁丑二條已備見於前文恒風條下矣此又複出史文之失於未加刊削者也

二年正月丙寅黃白氣環之○按環之上當有脫文其氣出何方或在何星也


宋史卷六十七考證

謹案卷六十六第二十頁前七行効守臣錢之望

以孽為瑞刊本瑞訛端據監本改

欽定四庫全書





總校官庶吉士臣張能照  
校對官檢討臣王坦修  
謄錄監生臣程華